



*Seconde Continuation.*

271

& les anatomies le verifioient , qu'il n'y auoit vertebre au corps humain , qui ne fust plus large & espaisse que la plus grande & large coste; partant que le morceau de coste que monstroit Mazuyer, n'estoit pas d'un corps humain.

Que la hauteur ou longueur de la teste estant douze fois plus grande que la plus longue dent d'un homme ; celles que l'on monstroit estans d'un pied de long, il falloit que Theutobochus eust eu vne teste de douze pieds de longueur : & qu'en sextuplant ceste longueur , son corps eust esté de soixante & douze pieds . Partant si ceux qui auoient escrit en faueur de ces pretendus os , eussent aussi bien sceu les proportions de chasque partie du corps qu'Appelles lors qu'il voulut depeindre un Geant , dont il ne voulut auoir que la main pour representer les autres parties du corps , on pouuoit assurément croire qu'ils ne se fussent hastez de mettre ainsi leurs imaginations en public.

Que si par le poids des dents , on pouuoit iugier de la pesanteur , grosseur & longueur du corps ( la plus grosse dent d'un homme ne pesant qu'une drame , comme a remarqué Gesnerus ) l'une des dents ( de ce pretendu Theutobochus ) pesant quatre liures , il n'y auroit point de doute , qu'il n'eust esté quatre cents fois plus gros & pesant qu'un autre homme.

Quant à ce que ledit auteur disoit que l'os femur ou de la cuisse auoit au dessous où estoient les trochanters , trois pieds de largeur , un pied & demy en la partie moyenne , & deux pieds en

















